

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- दुनिया भरै च अज्ज 10मां अंतराष्ट्रीय योग दिवस मनाया जा'रदा ऐ। प्रधानमंत्री नरेन्द्र मोदी होरें जम्मू कश्मीर च श्रीनगर थमां योग दिवस कार्यक्रमें दी अगुवाई कीती।
- प्रधानमंत्री होरें आखेआ ऐ जे जम्मू कश्मीर च विधानसभा दे चुनां तौले करोआए जांगन। उनें आखेआ जे जम्मू कश्मीर दा राज्य दा दर्जा बहाल करने दी योजनाएं पर कम्म चलै करदा ऐ।
- सीआरपीएफ दे डीआईजी ओपरेशन नार्थ जम्मू विवके बंदराल होरें आखेआ ऐ जे श्री अमरनाथ जी दी यात्रा गी कामयाब बनाने लेई सीआरपीएफ पूरी चाल्ली तैआर ऐ।
- भारती रेलवे नै रियासी च बनाए गेदे दुनिया दे सब्बनें शा उच्चे रेल पुल पर रेल दा आजमाईशी ट्रायल रन कामयाबी कन्नै पूरा कीता ऐ।

<><><><><><>

Yoga Day

मुख्य भरै दे कन्नो-कन्नी दुनिया भरै च अज्ज 10मां अंतराष्ट्रीय योग दिवस मनाया जा'रदा ऐ। प्रधानमंत्री नरेन्द्र मोदी होरें अज्ज बडलै शेर-ए-कश्मीर अंतराष्ट्रीय कनवेंशन सेंटर श्रीनगर च आयोजित कार्यक्रम च हिस्सा लैता। इस मौके प्रधानमंत्री होरें किट्ठे गी संबोधत कीता ते योग अभ्यास कीता। उनें योग राएं शारिरिक, मानसिक ते आध्यात्मिक विकास गी बी उजागर कीता। SKICC च आयोजित योग कार्यक्रम च खरी मती गिनतरी च लोकें हिस्सा लैता। उनें आखेआ जे श्रीनगर च योग कार्यक्रम च ओह योग दी ऊर्जा गी मसूस करी सकदे न। उनें अंतराष्ट्रीय योग दिवस दियां सब्बने गी शुभकामना दित्तियां। योग दिवस पर केई सारे मुल्खें च कार्यक्रम आयोजित कीते जा'रदे न। अंतराष्ट्रीय योग दिवस नै अपने 10 ब'रें दा सफर पूरा कीता ऐ। 2014 च अंतराष्ट्रीय योग दिवस दा प्रस्ताह रखेआ गेआ हा जिसे 177 मुल्खें दा समर्थन हासल होआ जेहड़ा अपने आपा च रिकार्ड ऐ। अदू थमां योग दिवस मनाया जा'रदा ऐ। इस मौके पर बोलदे होई प्रधानमंत्री होरें आखेआ.....

उपराज्यपाल मनोज सिन्हा केन्द्रीय मंत्री पी.जी.यादव ते होर दुए मन्ने परमन्ने दे लोकें कार्यक्रम च हिस्सा लैता। राष्ट्रीय राजधानी ते मुख्य दे होरने हिस्सें च बी योग दे कार्यक्रम करोआए जा'रदे न।

जम्मू दे आर.एस.पुरा सेक्टर आले अंतर्राष्ट्रीय बन्ने पर बी सीमा सुरक्षा बल दे जुआनें योग कीता। भारतीय सेना नै लेह दे कर्नल सोनम वांगचुक स्टेडियम च योग अभ्यास कीता। स्कूली बच्चें लद्दाख च पैगांग झील दे कंडे योग कीता।

<><><><><><><>

PM Modi Kashmir

प्रधानमंत्री नरेन्द्र मोदी होरें आखेआ ऐ जे जम्मू कश्मीर च विधानसभा दे चुनां बड़ी तौले करोआए जांगन ते नेडमे भविक्ख च जम्मू कश्मीर दा राज्य दा दर्जा ब्हाल करने दिएं योजनाएं पर कम्म चलै करदा ऐ। लगातार त्रीह बारी मुख्य दा प्रधानमंत्री बनने परेंत कश्मीर घाटी दे अपने पैहले-पैहले दौरे दरान मोदी होरें विधानसभा च प्रतिनिधिएं गी चुनने लेई जम्मू कश्मीर दे लोकें गी सक्षम बनाने दी जरूरतै पर जोर पाया। कल श्रीनगर दे SKICC च लोआए गेदे कार्यक्रम च अपने संबोधन दरान उनें हाल दे लोकसभा चुनाएं च बधी-चढ़ियै शिरकत करने लेई जम्मू कश्मीर दे लोकें दी सराहना कीती। जम्मू खित्ते च हाल दे आतंकवादी हमलें बारे बोलदे होई उनें आखेआ जे सरकार नेयी भैड़ी कोशशें गी नाकाम बनाने आस्तै वचनबद्ध ऐ। उनें खित्ते दी रमानदारी ते विकास च खलल पाने आले तत्वें दी सख्त निंदेआ कीती। मोदी होरें जम्मू कश्मीर थमां 370 हटाए जाने ते भारती संविधान गी इत्थें लागू कीते जाने दा बी जिक्र कीता। उनें संवैधानिक सिद्धांतें गी बरकरार रखने च नाकाम रौहने ते महिलाएं ते युवाएं गी बा-अख्तिवार नेई बनाने लेई पैहलकी सरकारें दी नुक्ताचीनी कीती। उनें अपने धेइयै गी पक्का करदे होई आखेआ जे उंदी सरकार खित्ते च रमानदारी ते खुशहाली गी बढ़ावा देने लेई वचनबद्ध ऐ।

<><><><><><><>

DIG Amarnath

सीआरपीएफ दे डीआईजी विवके भंनद्राल होरें इस ब'रे 29 जून थमां शुरू होने आली श्री अमरनाथ यात्रा दी तैआरिएं दा जायजा लैता। एह यात्रा 29 जून गी शुरू होग ते 19 अगस्त गी सम्पन्न होई जाग। मीडिया कर्मिएं कन्ने गल्ल करदे होई उनें आखेआ जे सीआरपीएफ इस ब'रे दी यात्रा गी सफलतापूर्वक सम्पन्न करोआने लेई पूरी चाल्ली तैआर ऐ। उनें आखेआ जे श्रद्धालुएं लेई इस यात्रा गी रमानदारी आला ते सुचारू बनाना चाहने आं। डनै। उनें आखेआ.....

<><><><><><><>

Yog Day Udhampur

अज्ज 10मां अंतराष्ट्रीय योग दिवस मनाया जा'रदा ऐ। एह्दा विशे सार ऐ अपने ते समाज आस्ते योग। उधमपुर दे सुभाष स्टेडियम आयोग योग कार्यक्रम च खरी मती गिनतरी च लोकें योग कीता। एह्दे च जिले दे अफसरें, सीआरपीएफ सेना दे जुआनें ते बच्चें बी हिससा लैता। इस दरान योग दे साढे शरीर ते दिमाग पर होने आले सकारात्मक असर बारे बी दस्सेआ गेआं इस मौके पर बोलदे होई उधमपुर दियां डिप्टी कमीशनर सलोनी राय जेड़ियां इस मौके मुख परौहनियां हियां, होरें सब्बने गी योग करने लेई गलाया। उनें आखेआ जे योग असंगी शारीरिक ते जैहनी तौर पर मजबूत बनांदा ऐ।



Cocoon Market

उधमपुर दियां डिप्टी कमीशनर सलोनी राय होरें कल उधमपुर च खुबटिएं दी निलामी सरबंधी बजार दा उद्घाटन कीता। एह्दे कन्नै उधमपुर जिले दे तकरीबन 5 ज्हार करसान जेह्दे रेशम दे कीड़ें गी पालने दा कम्म करदे न, गी फायदा होग। इनें खुबटिएं गी खरीदने लेई खरीददार कर्नाटक ते पच्छिम बंगाल थमां बी आए दे न। एह्दे च मकामी खरीददार बी हिस्सा लै'रदे न। एह बजार 13 जुलाई तगर खुल्ले दा ऐ। इनें खुबटिएं दा घट्टोघट्ट मुल्ल फही किलोग्राम स्हाबै 8 सौ रपे किलो रखेआ गेआ ऐ जेह्दा पैहले 510 रपे हा। रेशम दे कीड़े पालने सरबंधी मैहकमे दे निदेशक हुंदे निर्देश मूजब इक जागरूकता शिविर बी लाया गेआ। इस दरान करसानें गी उंदी सहूलत लेई बक्ख-बक्ख चाल्ली दे उपकरणें बारे बी दस्सेआ गेआ।



Chenab Bridge

भारतीय रेलवे नै चना दरेआ पर बनाए गेदे दुनिया दे सब्बने थमां उच्चे रेलवे पुल पर 8 डब्बे आली मैमू रेलगड्डी दी आजमाईश आला ट्रायल रन सफलापूर्वक पूरा कीता। एह्दे कन्नै रियासी थमां बारामुला तगर रेल सेवा शुरू करने लेई बत्त पदरी होई गई ऐ। इक ब्यानै च रेल मंत्रालय नै आखेआ ऐ जे 46 किलोमीटर लम्मे इस ट्रैक पर संगलदान, रामबन ते रियासी बश्कार 40 किलोमीटर फही घँटे दी रफतार कन्नै रेल दी सफल आजमाईश कीती गई। उधमपुर-श्रीनगर-बारामुला रेल लिंक परियोजना जेह्दे च 48.1 किलोमीटर लम्मा बनिहाल संगलदान आला रस्ता शामिल ऐ, दा उद्घाटन प्रधानमंत्री नरेन्द्र मोदी होरें इस ब'रे 20 फरवरी कीता हा।



Sudhmahadev

त्रै रोजा ऐतिहासक सुद्धमहादेव मेला अज्जै थमां शुरू होआ'रदा ऐ। जिला प्रशासन आस्सेआ मेले लेई तैआरियां करी लैतियां गेइयां न।

<><><><><><>

DDC Doda

डोडा दे जिला विकास कमीशनर हरविंदर सिंह हुंदे निर्देशों पर आर्ट ऑफ लीविंग दी टीम पास्सेआ कल इक विशेष सत्र दा आयोजन कीता गेआ जेहदा मकसद सब-डिवीजन भद्रवाह दे अफसरें-कर्मचारिएं गी दमागी सेहत ते तनाह दे प्रबंधन सरबंधी जरूरी हुनरें कन्नै लैस करना हा। कार्यक्रम दा संचालन भद्रवाह दे अडीशनल डिप्टी कमीशनर सुनील कुमार हुंदी दिक्ख-रिक्ख हेट करोआया गेआ। एहदा मकसद कम्मकाज आली थाहरें पर होने आले तनाह दे प्रबंधन ते दमागी सेहत बरकरार रखने च मदाद आली तकनीकां ते ज्ञान उपलब्ध करोआना हा। इस पैहलकदमी राएं कम्मकाज आली थाहरें पर मता बेहतर महौल जकीनी बनोग।

<><><><><><>

UGC-Net

सीबीआई नै यूजीसी-नैट जून 2024 आले मतेयान दे सरबंधै च इक मामला दर्ज कीता ऐ। एह मामला शिक्षा विभाग दे सचिव हुंदी तरफा हासल शकैत, कि यूजीसी-नैट दे मतेयान दी गरिमा कन्नै खिलवाड़ कीता गेआ ऐ, दी बिनाह पर बेपछानू लोकें खलाफ दर्ज कीता गेआ ऐ। मामला अपराधिक साजश रचने ते धोखाघड़ी जनेए अपराधें दिएं धाराएं तैहत दर्ज कीता गेआ ऐ। यूजीसी-नैट दा मतेयान मुख्य भरै च बनाए गेदे मतेयान केन्द्रें च इस म्हीने दी 18 तरीक गी लैता गेआ हा।

<><><><><><>